

LA PATRIE DAL FRIÛL

SFUEI MENSÎL INDIPENDENT

www.lapatriedalfriul.org

info@lapatriedalfriul.org

Direzion e Aministrazion - Udine - via del Cottonificio 129

Tassa pagata / Taxe perçue Udine Italy - mensile / mensil spedizion in abonament postâl Poste italiane s.p.a.

EDITORIÂL

SCUNIS VUEIDIS, CE SPIETÛNO PAR FÂ ALC?

Erika Adami

❖❖ O sin tal ultin bocon dal an e cjalant a chel che al vignarà, ce vino di sperà pe nestre tiere? Par cualis bataiis valie la pene di stiçà la cussience dai furlans? *La Patrie dal Friûl* e à provât a dâ cualchi rispueste su chest numar. Ma cui puartaraial indevant chès bataiis? Sal domandin dopo vè let lis ultimis statistichis demografichis, che a piturin une situazion nere: pôc plui di un frut par femine in Friûl-Vignesie Julie. E la tindince - di agnorums - e je a lâ simpri in piès.

❖❖ Nol è stât programatorâl che nol vedi previodût incentîfs ae natalitàt. La Zonte Serracchiani, cul mandât in scjadince, e veve ancje fat bon un "bonus bebè" di 1200 euros. Di çampe a drete al è stât dut un sfiorî di propuestis par contrastâ il fenomen des scunis vueidis. Ce fin àno fat? Cumò il governadôr leghist Fedriga al à fat savè che, su propueste dal Friûl-Vignesie Julie, dentri dal program Gect-Euregio cence confins, al è stât imbastît un grup di lavôr cun Venet e Carinzie par frontâ la cuistion. O lassin ai esperts la definizion di politichis par fâi cuintri al câl des nassitis, ma, ocjo: volîno dâ une prospettive (sociâl, culturâl, economiche...) aes nestris comunitâts? Alore nol è plui timp di pierdi. ■



IL FRIÛL CHE AL VIGNARÀ Ce speròno pe nestre tiere? Lis bataiis di scombati tal 2019

Inchieste a pagj. 4-5

IL FAT

Furlan a scuele a risi par colpe de burocrazie

Walter Tomada

Tantis voltis al fâs comut dâ lis robis par scontadis, ancje se al è pôc timp che lis vin conquistadis. Par esempli, i furlans a dan aromai par scontât il dirit dai lôr fruts a podè selzi l'insegnament de marilenghe inte scuele. Une volte al jere un sium, ma al è diventât realtât cu la aprovazion de leç 29 dal 2007: di bot, però, fra cualchi setemane i furlans a podaressin sveâsi cence il furlan a scuele, parcè che il dirit che no si è rivât a dineâ in grazie de leç cumò al riscje di jessi dineât cu la burocrazie.

La situazion, par cui che no le cognòs, e je cheste: daûr de leç, ogni scuele de zone de regjon di fevele furlane e à di ativâ chest insegnament, se lis fameis lu domandin. Il 70% lu fâs. Chest al à un cost (che si cuantifiche daûr des domandis che a rivin di ogni istitût), ma i finanziaments a son simpri rivâts cun setemanis (o mès) di ritart a pet de partence dal an, obleant simpri lis scuelis a un "tour

de force" inte programazion che al domandave di tacâ lis lezioni ancjemò prin di vè i bêçs o di concentrâlis dutis ae fin dal an, cul pericol di çoncjâ lis ativitâts e di no sigurâ ad implen un dirit ai fruts e aes lôr fameis. Chest an, però, la situazion e je plui grivie di simpri. La gnove aministrazion regjonâl e varès di fat decidût (o doprî il condizionâl parcè che no je olme di deliberazion in chel sens) di rivodi i criteris di ripart su la tutele de lenghe furlane e in spiete di fâlu e à prorogade "sine die" la assegnazion dai riparts pal insegnament dal furlan

a scuele. De cuistion e varès di ocupâsi la Comission permanente pal insegnament dal furlan che e je stade in part rinovade, ma no ven ancjemò convocade. In spiete di gnovis, lis scuelis no san se lis spesis par furlan a son cuviertis, ni par chest an (dulà che i bêçs a son za stâts stanziâts, ma no je licence di spindiju) ni pai agns a vignî. La consequence cuale ise? Che intant, cence savè ni se i bêçs a rivaran o no, ni trops che a saran, i dirigjents chest an a podaressin fâ saltâ l'insegnament dal furlan e nissun al podarès daûr tuart. Se a cambiassin i criteris e no fos plui

cuvierture finanziarie adeguate, lis scuelis no podaressin plui fâ la programazion (che cumò e je trienâl) e duncje il furlan al saltarès ancje pai 3 agns seguitîfs. La aprovazion dai Ptof (Plans trienâi de ufierte formative) e va fate prin de scjadince des iscrizions, ven a stâi a Zenâr. O contin che par in chè volte la situazion e sedi risolte, che la Comission si dedi dongje e che e aprovi criteris che a permetin di insegnâ il furlan come che al è stât fin cumò e ancjemò miôr. Se nol ves di jessi cussì, duj i furlans a savaran che i lôr socestants - simpri a pro dal furlan in ogni campagne elettorâl - a àn violadis intune volte dôs leçs, une statâl e une regjonâl. E ocjo! A metin a risi un patrimoni di risorsis e di esperience che tai ultimis agns si è consolidât e insiorât intune comunitât di insegnament inzornade e inovative. Al sarès un pecjât mortâl. E al sarès inutil pintîsi cuant che al sarà masse tart. ■

BUINIS FIESTIS

La redazion e fâs i miôr auguris a duj i letòrs e aes lôr fameis

★ **Bon Nadâl,**
bon finiment e bon principi.
Che Diu us dei dal ben,
par chest an
e par chel cu ven

★ **Si tornin a viodi**
❖ in Zenâr ❖

❖ a pagjine 2
**GRANÇJ EVENTS SÌ,
MA AL È TANT CE FÂ
PAL TURISIM IN MONT**
Zûcs olimpîcs invernaî
de zoventût in Friûl tal 2023.
Si bramin ancje lis Olimpiadis

❖ a pagjine 3
**«REDIT DI CITADINANCE?»
DINLU A CHEI
CHE A CURIN IL BOSC»**
614 milions di dams pe bugade
di brut timp te mont furlane:
masse eròrs te gjestion dal territori

❖ a pagjine 6
**A SAURIS DISOT
IL "BADANT" DES PIECIS
DI ÇUÇ DI MALGHE**
Ae scuvierde dal mistir
dal afinadôr che al fâs
"cressi" i formadis

❖ pagjine 7
**SEGNÂI DI LÛS
DAL OSCAR FURLAN
DE SCRITURE**
Il "San Simon" al à mostrât
un panorame vivarôs
e a plui vôs

❖ a pagjine 9
**FÂ CLIL PAR FURLAN.
AL È PRONT PAR PARTÏ
IL PRIN CORS IN LINIE**
Indreçât ai mestris di lenghe,
lis iscrizions a son viertis
fin ai 20 di Dicembar

ASSEGNAZION DAI ZÛCS EYOF 2023 E OLIMPIADIS 2026

Grancj events sì, ma al vûl plui impegn par fâ jevâ il turisim intal Friûl de Alte

For di Avoltri al domande stesse dignitât di finanziaments di chei altris pôi schiistics regionâi

Roberto Pensa



Al bateve un pôc ancje il cûr de mont furlane miercus ai 28 di Novembar a Tokyo, dulà che e je stade presentade pe prime volte al Comitât olimpico internazionâl la candidature di Milan e Cortine ai zûcs invernâi dal 2026. Su la taule e je di fat la propueste di For di Avoltri tant che sede dal Biathlon, puartade indenand ancje de Region. Dopo dal ritîr de neozelandese Calgary, a sfidâ i talians e je restade dome Stockholm, ma l'inseriment dal Friûl inte candidature taliane al reste une partide dute di zuiâ, magari sburtant su la lidris dolomitiche comune. Dut cás, i cinc cercelis olimpics a cjataran cjase tal Friûl de Alte.

Par cumò inte version "junior" dai Eyof, i zûcs olimpics invernâi de zoventût europeane (par fantats dai 9 ai 14 agns) che la edizion dal 2023 e je stade assegnade al Friûl-Vignesie Julie a Marbella (Spagne) ai 10 di Novembar stâts. Il curling al larà a Claut, snowboard, short track e patinaç artistic a Plan dal Cjaval, biathlon a For di Avoltri, fonts a Sapade, sul Çoncolan lis gnovis dissiplinis, o ben freestyle e skicross, a For Disore il schialpinisim, hockey a Pontebe

e par finî Tarvis e Nevee cun dut il schi alpin, salt e cumbinade. Ancjemò grancj avigniments sportîfs, duncje, intindûts tant che clâf pal rilanc de mont furlane. Une ricete sot atac di tantis bandis, al baste visâsi par esempli dal cás di Turin che nol à volût aleâsi cun Milan e Cortine pe candidature 2026, vint vinçût in consei comunâl la componente politiche dai 5 Stelle (e no dome) che e denunzie i

cosej alts di chescj avigniments, no compensâts di vuadagns adeguâts. Ma ce pensino i sindicis furlans interessâts?

Vidale: «La Region e varès di creâ struments di incentiv par incoragjâ lis personis a invistî intal setôr turistic. Lu vin domandât plui voltis. Si à di crodi a di cheste pussibilitât, o la mont e je destinade a murî»

FOR DI AVOLTRI AL BRAME LIS OLIMPIADIS, MA AL È TANT CE FÂ!

«Al è clâr che fâ i zûcs olimpics ca al darès un vuadagn

enormi dal pont di viste de imagjin turistiche – e rimarche la sindiche di For di Avoltri, **Clara Vidale** –. E je une concorenza fuarte, ma o sin convints di vê lis nestris cjartis di zuiâ, tant che il fat che ca a son nassûts diviers champions. Chel des Olimpiadis nol è dome che un sium, ma un domandâ par otignî pardabon. O vin ancje la fortune di vê la presince di Bella Italia a Plans di Luce, cun plui di mil puescj jet, che e podarès sodisfâ lis esigjencis dal event, in plui che naturalmentri

il centri biathlon, ricognossût tant che une zoie ancje de Federazion taliane sports invernâi. Un grant sfuarç di volontariât de bande di tantis associazions al à fat in mût che il centri biathlon al tornàs a partî inte maniere miôr dopo des aluvions resintis».

Ma nol è dut aur chel che al slusiche, cualchi probleme al è. «La Region e à di crodi in nô – e sclaris Vidale –, prin di dut metint il centri biathlon intal circuit Promotur. Al è un investiment che al podarès puartâ una tornade di imagjin a dut il Friûl-Vignesie Julie. Cumò il nestri centri sportîf si base tant sul volontariât.

Se invezit al fos tratât tal stes mût di chei altris centris sportîfs furlans invernâi che a son dentri intal circuit Promotur al sarès un biel salt di cualitât. Il probleme economic al è tant pesant, sedi pe manutenzion sedi par une revision complessive dal centri biathlon, che al scomence a sintî il pês dai agns. Chest al vâl ancje in relazion ai Eyof 2023». Cun di plui, al è di fâ in maniere che l'event sportîf al puedi diventâ pardabon una clâf di disvilup pe economie di chest piçul comun a vocazion turistiche (baste pensâ aes perlis alpinis dal Colians e dal lât di Volaje).

«Si à di rinfuarçâ lis strutturis alberghieris dal paîs, lis ocasions di lavôr e di cressite economiche cul indot dal sport – e sosten la sindiche –. La Region e varès di creâ, in viste dal 2023 e dal 2026, struments di investiment e di incentiv par incoragjâ lis personis a invistî intal setôr turistic. Lu vin domandât plui voltis, ancje ae Uti de Cjargne. Si à di crodi a di cheste pussibilitât, o la mont e je destinade a murî. In plui, lis ultimis calamitâts naturâls no fasin altri che meti intal anim des personis la voie di lâ vie parcè che i discomuts, soreddut intes comunicazions, a son tant grancj. La nestre int e je daûr a patî une situazion une vore grave di disservizi».

PONTEBE I CRÔT: «OCASION PAR MIORÂ IL PAÏS»

Intai zûcs olimpics de zoventût europeane al sarà cjapât dentri ancje il comun di Pontebe cul palaç de glace, dulà che si davuelzaran lis garis di hockey. «Si visin ancjemò de bieles esperience des Universiadis dal 2003 – al rimarche il sindic **Ivan Buzzi** – che purpûr nus àn permetût di ampliâ il palaç de glace e di cressi lis dotazions. Dutis strutturis che a vegnin dopradis tant ancje vuê. Chel che di gnûf chest event al pues puartâ, al è un ampliament dai puescj jet. Il palaç de glace al podarès jessi doprât ancjemò miôr se o disponessin di strutturis che a fasin di forestarie. Al è l'interès fuart di diviersis scuadris di hockey su glace di vignî a Pontebe in ritîr invernâl o estîf. O speri, cul event Eyof dal 2023, di cjatâ lis risorsis par comedâ une struture alberghiere dongje dal palaç de glace, aromai sierade di 5-6 agns. O sai che ancje altris Comuns interessâts dai Eyof a àn il stes probleme».

I zûcs a jentrin ancje in mût virtuôs intun procès di miorament dal paîs previodût de leç regionâl 14 dal 2018, che e à "compensât" Pontebe pal tramont dal progjet dal implant di assension par Pramuel, cul disvilup alberghier conetût: «O vin un finanziament di 2 milioni di euros par sdrumâ lis casermis dismetudis par un totâl di une desene di etars, e dopo 15 etars di stazion ferroviarie dismetude – al sclaris Buzzi –. O vin ancje za presentât ae Region un plan di fatibilitât par 11,5 milioni di euros par una serie di intervencs di recupar, tant che ripuartâ a vert furnî lis areis ferroviariis dismetudis, completâ la piste di fonts, la aree wellness dal palaç de glace, par creâ un centri anzians comprensoriâl ristrutturant une scuele dismetude, e par creâ un museu storic citadin. Dutis oparis che a jentrin ben intun troi di disvilup turistic, pensât de int midiant di taulis tematichis».

Buzzi: «I zûcs a jentrin intun procès di miorament di Pontebe previodût de leç regionâl che le e à "compensade" pal tramont dal progjet dal implant di assension par Pramuel»

presentât ae Region un plan di fatibilitât par 11,5 milioni di euros par una serie di intervencs di recupar, tant che ripuartâ a vert furnî lis areis ferroviariis dismetudis, completâ la piste di fonts, la aree wellness dal palaç de glace, par creâ un centri anzians comprensoriâl ristrutturant una scuele dismetude, e par creâ un museu storic citadin. Dutis oparis che a jentrin ben intun troi di disvilup turistic, pensât de int midiant di taulis tematichis».

LINT FURLANE



Cjaln indenand cun sperance

Dree Valcic

****** Si siere un an plen di significât dal Friûl. Al sarès dibant sotlineâlu se no valès invezit propit la pene di rimarcâlu: lis elezions de Vierte a àn segnât un moment impuartant pe lungje bataie autonomiste.

****** Dopo tancj agns, la presince di doi conseîrs regionâi dal Pat pe Autonomie al vûl di che, ancje dal pont di viste istituzionâl, alc al è cambiât, alc si è movût. Un segnâl: al è ancjemò tant di fâ, ma dopo tantis provis, masse faliments, ancjetantis sperancis delududis, al è rivât un messaç positif di unitât. Visinsi: une unitât nassude e "protete" de statur morale e politiche di une figure di riferiment tant che chê di Sergio Cecotti, bon di catalizâ ator de sô candidature il favôr, e il vôt, di tancj eletôrs che doman a varan di jessi riconquistâts e ampliâts midiant no plui dal carisme di un leader, ma di une scuaire, di un progjet credibil e vincidôr.

****** Il consens, no dome chel tal moment dal vôt, si oten partint des esigjencis di un popul, rivant a trasformâ "il sium di una robe" inte sô realizazion. Un procès lunc e dificil, una sfide intun mont che al cambie plui svelto di ce che o crodin, e che dal so indicadôr "di progrès" o sin simpri mancual cierts.

****** La tentazion duncje di cjalâ bande il passât e je fuarte, come se in chel si podès cjatâ confuart e rispuestis al presint, dispès in mût acritic e velât dome de aparence. Al reste un nestri dovê difindi lis tradizions, come che o sin braurôs di chei valôrs trasmetûts, di chel "salt, onest, lavoradôr", ma savint che al va interpretât sbrumât de retoriche e dal paternalisim. O volin che e sedi la constatazion semplice di un mût di jessi, di una diversitât ancje morâl, di una dote che o puartin intal grant cjalderon de umanitât. Altri che "sotans". Dopo secui di domini di altris, di campagnis di continui discognossiment culturâl e storic, di emarginazion economiche e sociâl, pûr in ogni cás o sin ancjemò ca a celebrâ inte nestre amade marilenghe une vitorie e une resistence che e continue.

****** Une lenghe che vuê si esprim in ducj i cjamps dal savê, inte vite cotidiane, inte informazion, ancje midiant dai sistemis modernis di comunicazion. Al podarès someâ un fat naturâl, ma invezit – intes cundizions di cumò di atac aes minorancis, al diviers, dulà che al domine il predominio italic di brute memorie – al è il risultât de volontât di fier di un popul di no pierdi la proprie anime. Se Diu al volarà, o larin indenand su cheste strade. ■

MONT FERIDE

«Redit di citadinance? Dinlu a chei che in mont a curin il bosc»

La Giant Trees Foundation, cun sede a Tarcint, e vise: «La bugade di brut timp no je stade une fatalitât. E si ripetarà ancjemò»

Roberto Pensa



ARBUI BUTÂTS JÙ DAL BRUT TIMP

«**I**nvezit che dâ bêçs a cui che nol fâs nuie, il redit di citadinance che al coventi a sostignî cui che si da di fâ e che al oriente lis propriis sieltis di vite par che la mont no mueri»: **Andrea Maroè**, president de Giant Trees Foundation, nassude a Tarcint, ma cuntune cjalade che si slargje a dut il globi par cambiâ il mont tacant dai arbui, al jentre a pîts unîts intal dibatiment politic su la prossime leç di belanç.

La vuestre analisi e je clare: no sin devant di une fatalitât, ma dal risultât di diviers eròrs fats intal passât su la gjestion dal teritori. Di cui sono lis responsabilitâts?

«Cu la dibisugne di vè di plantâ arbui par produci legnam, tantis cuestis des monts dal Friûl de Alte a son stadis popoladis cu lis stessis speciis, cun plantis coetaniis e cuntune disposizion une vore fisse, cence valutâ la specificitât dai terens e dai lûcs. Dopo, chest bosc costruît dal om al è stât bandonât a se, in tancj câs par vie dal dispopolament. Dut chest al à influît in mût determinant inte calamitât des setemanis passadis, che purpûr e je stade ecezionâl, ma che intal prossim futûr e je destinade a diventâ la norme».

Trop ise difondude cheste situazion di pericol inte mont furlane?

«Vuè la situazion di emergjence e somee passade, ma in realtât e je dome scomençade. O vin pierdût il patrimoni boschif che o varessin vût di doprâ intai prossims 4 agns, plui o mancul il 20% dai nestrîs boscs. Ma il dam plui grant al sarâ chel sucessif ae catastrofe, intal sens che i boscs ferîts dal brut timp a diventin tant plui delicâts e sometûts ancje aes intemperis di intensitât minôr. A laran indenant a colâ i arbui e, une volte gjavâts vie i troncs che a son colâts, il teren al sbrissarà a val cu la prime ploie e lu cjatarin dut a Lignan e a Tisane. Duncje, si varâ di pensâ no dome a rimplacâ i boscs, ma ancje a dâ un regjim aes aghis e a creâ barrieris par frenâ il slavâ dal teren, se di no no savarìn nancje dulâ plantâ arbui gnûfs. Si varâ di tornâ a pensâ a ce plantâ, cemût e dulâ».

Il probleme al è tant complès: di mieç al è il dispopolament de mont, i terens a son di proprietât private e il sfrutament dal len al domandarès une filiere moderne che e pues jessi promovude dome des aziendis privadis dal setôr. Di dulâ scomençâ?

«La nestre propueste e je ché di preparâsi a frontâ altris avigniments estremis gjenerâts dal cambiament climatic, ricostruint un tiessût economic e di lavôr in mont. Al moment, no vin implants di seis in stât di

lavorâ volums alts di legnam, ni di stocâlu par doprâlu intai moments che il presit al è favorevul, robe che cumò e sarès tant utile dopo de ondate di brut timp che e à provocât la colade des cuotazioni. Chest però al vûl di ripuartâ la int a stâ e a lavorâ intal teritori di mont. A van dâts incentîfs fuarts ai zovins par tornâ o par insediâsi. Il redit di citadinance dinlu a cui che al torne a vivi e a lavorâ in mont!».

Al è un lavôr enormi, che al durarà decenis, par introduci une rotazion culturâl dal bosc... Di dulâ si aial di partî?

«Il progjet de nestre fondazion al è chel di racuei fonts, inte iminence dal Nadâl, vendint i ramaçs e lis pontis crevadis dai arbui butâts jù dal aiar. Cun chescj bêçs, o volaressin creâ boscs sperimentâi su variis cuestis de Cjargne, caraterizâts di diviersis tipologjîs di terens, cun plantis diviersis

Andrea Maroè: «A coventin poiis fuarts ae economie intes tieris altis, tacant dal len e de nature»



ANDREA MAROÈ

di etâts diferentis. I risultâts no saran ciert imediâts, ma a tocjaran diviers decenis, ancje se cualchi buine idee e podarà vigni sù za tant prime. Il bosc al à di jessi plantât dome intes zonis adatis, e ognidune cu lis speciis adeguadis. Inaltrò, lis cuestis a àn di tornâ a prât o al massim a varan di jessi popoladis di cualchi baraç, alaçs e piçul arbossits a cressite lente».

Une variabile fundamentâl e je dade però dal redit dal bosc: se in passât si son plantâts pôi o peçs al è par une ricercje disperade di dâ un rindiment aes tieris altis...

«A van plantadis essencis

«O vin di cjalâ il rindiment dal bosc no dome pal legnam, ma ancje sot forme di difese de diversitât biologjiche, dal aspjet paisagjistic e turistic, de difese idrogeologjiche»

preseadis buinis di dâ une rispueste economiche par cui che al lavore il bosc, ma al è un investiment pluriennâl che al à ciclis di 40 agns o plui luncs. O vin di cjalâ il rindiment dal bosc no dome pal legnam, ma ancje sot forme di difese de diversitât biologjiche, dal aspjet paisagjistic e turistic, de difese idrogeologjiche. Par chest, cui che al lavore il bosc al merete une poie tant che il redit di citadinance, parcè che al prodûs resis, esternalitâts positivis che dopo a colin su dute la coletivitât e no dome su ché de mont. Si trate di rindi sostignibile une ativitât che pai prins 10-15 agns no sarâ profitevole dal sigûr. Infin, e va ricostruide une filiere industriâl dal len che intal timp o vin pierdût».

614 milions di euros di dams

614 milions di dams: cheste la stime definitive de ondate di brut timp (cun ploie torenziâl e aiars a plui di 100 km/h) che e à colpît in particulâr il Friûl de Alte a cjaval tra Otubar e Novembar passâts. I dams plui grâfs a son stâts chei aes oparis di difese idrogeologjiche (323 milions), po dopo chei aes stradis (98 milions), boscs (55 milions), bens publics (ospedâi, scuclis...), rêts eletrichis (16 milions), bens privâts (15 milions), ativitâts economicis (9,6 milions), acuedots (8,7 milions), setôr de pescje (6,3 milions), patrimoni culturâl (2,7 milions), tant che par esempli lis Plêfs cjargnelis. Positive la prove ufierte des structuris di emergjence e de Protezion civil, e miorade a pet des esperiencis passadis ancje la azion di restaurazion des liniis eletrichis prejudicadis dal aiar e dai arbui colâts. Lodevule, in linie cu la tradizion furlane, la azion dal volontariât, sedi chel organizât sedi chel mobilitât des rêts di vicinât. ■

Nadâl cuntun arbul “ferît” dal brut timp

Tancj comuns, ancje de Lombardia e de Emilie-Romagne, si son ufierts di furni lis lôr placis cun ce che al reste dai boscs colpîts dal brut timp, e a Sant Quarin (Pordenon) a fasaran fintremai un arbul di Nadâl assemblant 5-6 framents dai boscs cjargnei ferîts. A son i efets de iniziative “Par Nadâl fâs nassi un bosc gnûf”. I associâts de Giant Trees Foundation a son daûr a racuei lis pontis e i apiçs dai arbui colâts cul fin di sostignî lis popolazions di chescj teritoris e di permeti ancje l’ûs di arbui coltivâts par Nadâl, plantantju in sostituzion dai boscs colâts. Si pues sostignî in maniere economiche la iniziative al leam <https://www.gianttrees.org/it/sostienici> dulâ che si puedin cjatâ ancje duçj i inzornaments de iniziative e lis modalitâts par “adotâ” un arbul colât. ■

**Par viodi chei altris contignûts
de “La Patrie dal Friûl”,
abonaitsi. Dutis lis informazions si cjatin sul sît
www.lapatriedalfriul.org**

**Per vedere gli altri contenuti
de “La Patrie dal Friûl”,
abbonatevi. Tutte le informazioni si trovano sul sito
www.lapatriedalfriul.org**

Che tu sedis za abonât o che tu le vedis lete dome cualchi volte,
aboniti o rinove l'abonament a un mensîl unic:
almancul une volte al mês, lei par furlan!

